

Ekitabho kya

# Yoona

Mu-nyaaika ya Ekikwaya

Kitabu cha

# Yona

Katika lugha ya Kikwaya



Pamoja na Huduma ya Kutafsiri Biblia  
Katika Lugha za Asili Mkoa wa Mara  
S.L.P. 1235, Musoma, Tanzania

**Ekitabho kya Yoona**  
Mu-nyaaika ya Ekikwaya

Kitabu cha Yona  
Kwa lugha ya Kikwaya

The Book of Jonah  
In the Kwaya language

Copies printed: 500  
Trial Edition

Illustrations on cover and pages 1, 5, 6, and 7 are used by permission of the  
© 1996 David C. Cook Publishing Co.

©Wycliffe Bible Translators, Inc. 2013

## **Obhutangati bhwa ekitabho kya Yoona**

Ekitabho kinu kitakususana na ebhitabho ebhindi ebhya abharagi, kyeki kiri na masimuro iiguru ya Yoona. Yoona :aariga ari muragi, asookereeye mu-musi gwa Gati-yeferi. Omusi gwa Gati-yeferi :gwariga guri Ijirayeeri eyo. Yoona :aariga ari mumura wa Amitayi. Amitayi uyo :aariga ^naasookerera mw-iyito rya Jabhurooni. Yoona :aariga ari-wo mu-kabhaga kanu omukama Yerobhowamu wa akabhiri :aariga atungire Ijirayeeri, orubharika rwa eburungu (2 Abhakama 14:25). Na insonga ya riisiina rya Yoona ni *Nguuti*. Kabhaga kareera-wo, ekyaro kya Ashuru :kyariga kisokeene na ekyaro kya Ijirayeeri ekyo orubharika rwa eburungu. Niwe Nyamuwanga ^naatuma Yoona agende mu-musi omukuru ogwa Ashuru ayo. Omusi guyo :gwariga ngutogwa ati, Ninawi. Yoona ^naagenda okugaanya abhaanu bha Ninawi, kwa okubha abhaanu bhayo :bhaariga bhari bhakayi ku-Nyamuwanga. Ekitabho kinu ekikiyyigisha ati ginookwe gya Nyamuwanga giri ku-mayito goone. Kweki ekikiyyigisha ati, riing'ana rinu Nyamuwanga kenda okukora ritakutura kuyingwa na muunu. Ku-bhwambiro Yoona :aaremere ing'ana ya Nyamuwanga, nawe ku-bhuteero :aagendere ^naakora kutyo Nyamuwanga :aariga ^neenda. Bhunu :aariga ari eyo, Yoona ^naabhiyirwa muno, kwa okubha Nyamuwanga :aabhiyiye abhaanu bha Ninawi, enu abhaanu bhayo :bhaariga bhari bhasoko bha ekyaro kya Ijirayeeri.

## **Ameeresho iiguru ya giinyuguta gya giinyota ginu uraarore mu-makaamo ganu**

Ukasoma ekitabho kinu, owutura okurora ku-mang'ana agandi iri-wo inyuguta ya inyota rwa inu \*. Inyuguta iyo eyikweresha ati uringire emwaro ukasiga ganu owusoma, uwunyoora-wo ameeresho ganu agasomboora amang'ana gayo kujomu.



# Yoona

---

## Yoona keeruka Nyamuwanga

**1** <sup>1</sup>Orusuku rumwi, riing'ana okusooka ku-Yewobha<sup>\*</sup> Nyamuwanga ndijirja Yoona omumura wa Amitayi, ^noongwa ndimubhwira ati, <sup>2</sup>"Iimuka ugende mu-musi gunu ogutogwa Ninawi ubhagaanye, kwa okubha naarora ebhikayo bhyebhwe bhyabha bhyafu muno mu-meeso gaani." <sup>3</sup>Mmbe Yoona ^naamba orugendo, nawe weeki ^naaramura okugwata injira eya okugya Tarishiishi. Okugenda eyo Yoona :aariga ^neeruka Yewobha. ^Naaribhata ^naayika mu-musi gumwi ogutogwa Yaafa, ^naagenda ku-kigobho kya giimeeri. ^Naanyoora iimeeri eyimwi yaayikiishe okwimuka okugya Tarishiishi. ^Naagwata giiyera,



Yoona kaariinya mu-meeri (1:3)

---

\* **1:1** *Yewobha* ni esiina rya Nyamuwanga. Bhunu Indagano ya Kara :yayikiye ku-bhuteero, Abhayawudi :bhaariga mbabhirikira Nyamuwanga ati *Yewobha*. Kimwi mbaramura okusiga okubhirikira Nyamuwanga kw-isiina riyo *Yewobha*. Kikaamire riisiina *Yewobha* kwa okubha nikwo kutyo :yaariga ikaamirwe ku-makaamo ga Ekiebhuraaniya aga kara. Insonga ya riisiina *Yewobha* ni *Anye niwe*. Ringira Kutoka 3:14-15.

^naariinya mu-meeri na abhaanu abhandi okugya Tarishiishi, Yewobha asige okumurora.

### **Yewobha kaatiimura omuyaga mu-nyanja**

<sup>4</sup>Bhunu iimeeri :yaariga iri mu-bhusibha agati, Yewobha ^naatiimura omuyaga mwafu mu-nyanja, iimeeri niirebherera okutubhira. <sup>5</sup>Abhakosi bha mu-meeri moyo, mbaamba okuyaya. Abhaanu bhoone mu-meeri moyo, mbaamba okuririra amasambwa ga ewaabho. Mbaramura okwesa emijigo egindi mu-nyanja, iimeeri isuuwe obhusito. Mu-kabhaga kayo koone, Yoona :aariga ari mu-meeri emwaro, awongeyega ntiro.

<sup>6</sup>Omugofi\* wa mu-meeri moyo ^naamuuja-ko ^naamubhwira ati, “Eyibha kutiki ati awe uwongeeye? Ramuka wiisasaame riisambwa ryawo, amwi eritura okukifwira ekigongo, kisige okusika.”

<sup>7</sup>Abhakosi bha mu-meeri moyo mbaikana ati, “Kibhume inkuura kigwate unu aakireetera ing’anga inu.” Mmbe, mbabhumma inkuura, inkuura niigwira Yoona. <sup>8</sup>Kimwi mbaamba okumubhuusirisha mbaaikaga ati, “Woori nuukibhwire ni ing’ana ki inu yaakinyoora? Owukora mirimu ki anu? Owusookerera aaki? Uri muunu kusooka kyaro ki? Uri muunu wa eyito ki?” <sup>9</sup>Yoona ^naabhasubhya ati, “Anye niri mu-Ebhuraaniya, anye eniramya Yewobha, Nyamuwanga wa mu-rwire. Yewobha Nyamuwanga niwe :aabhumire orwire, inyanja na ekyaro kyone.” <sup>10</sup>Kimwi Yoona ^naabhabhwira ati :aariga ^neeruka Yewobha. Niwe abhakosi bha mu-meeri moyo mboobhaya muno mbabhuusha Yoona ati, “Waakora kiinu ki ku-Yewobha?”

<sup>11</sup>Mu-kabhaga kayo koone inyanja :yaariga ibhiyiwe, omuyaga guri mwafu muno. Mmbe mbabhuusha Yoona ati, “Kikukorere kiinu ki omuyaga gutemekere?” <sup>12</sup>Yoona ^naabhasubhya ati, “Mungege munsikye mu-nyanja, inyanja eyija okusiiriika. Gari abhweru ati ni anye naakora ing’ana inu yaabhanyoora.” <sup>13</sup>Mmbe, abhakosi bha mu-meeri mbasaka okufugya iimeeri iyo bhayiyikye ku-murambo, nawe omuyaga ngubhataamya, kwa okubha :gwariga guri mwafu muno. <sup>14</sup>Mmbe, abhakosi bhayo mbaririra Yewobha mbaika ati, “Ee Yewobha, ekikwisasaama, utaaja kukisikya, kikeeta omuunu unu. Ku-eswe omuunu unu ekirora ati atari na kikayo. Woori waasiga

---

\* **1:6 Omugofi.** Mu-Kiswayiri abhaaika ati, *dereva wa meli*.

okukirumbira kikeetira amanyinga gaaye. Ee Yewobha, eswe kimenyere ati, waakora kutyo awe owenda.”

<sup>15</sup>Mmbe, mbayanga Yoona mbamusikya mu-nyanja, ayoayo inyanja nisiiriika. <sup>16</sup>:Bheejire bhaarora kutyo abhakosi bha mu-meeri moyo mbayaya muno, mbasoosisha Yewobha Nyamuwanga ekimweso, mbarya nawe imuuma. <sup>17</sup>Kimwi Yewobha ^naasiiga riiswi riinene erya mu-nyanja\* rimire Yoona. Yoona ^neekara munda ya riiswi riyo nsiku esatu ngeta na mu-mwisi.

### Yoona keesaasaama

**2** <sup>1</sup>Mmbe, Yoona bhunu :aariga ari mu-nswi moyo, :eesaasaamire ku-Yewobha, Nyamuwanga waaye, <sup>2</sup>^naaikaga ati,

“Mu-kabhaga ka inyaako yaani,  
:naakwisasaamire awe Yewobha waani,  
woone nunyiitegereesha.

Bhunu :naariga niri mu-kisuute naakuririiye,  
woone nuungwa ekiriro kyaani.

<sup>3</sup> :Waanyesere mu-manji ebusibha mu-nyanja,  
gingeji nginyiyinda,  
amabhooka ga obhuturo bhwawo,  
ngatura ku-mutwe gwani.

<sup>4</sup> Noone naaika ati,  
neeserwe areera na ameeso gaawo,  
nawe anye riiyekaru ryawo eryeru,  
nitaritura kusiga okuriringira.

<sup>5</sup> Amanji :gaanyiyindire,  
ngayiganya na mu-mutima gwani,  
amanji ngayikira mbaara gyone,  
ebhiimesha bya mu-nyanja mbinfundikira omutwe.

<sup>6</sup> :Neekire emwaro mu-manji,  
niiyika ku-nsi ku-bhwambiro bhwa ebhiima,  
ku-kyaro kinu ginyigi gyakyo gigaaye kajaanende.  
Nawe awe Yewobha Nyamuwanga waani,  
unsoosiishe mw-itoko moyo niri muworu.

---

\* <sup>1:17</sup> Riiswi riinene erya mu-nyanja. Mu-Kiswayiri riiswi riyo abharitoga ati nyangumi.

- 7 Anu omwoyo gwani :gwambire okuwa-mo,  
:naakuyiitire awe Yewobha Nyamuwanga waani,  
obhwisasaami bhwani mbukuyikira,  
kw-iyekaru ryaawo eryeero.
- 8 Abhaanu bhanu abharamya ebhisusano bhyia emisambwa  
yebhwe enu gitaasakira,  
abhabhusha iinema yaawo inu :waariga ubhatuuriye-wo.
- 9 Nawe anye, ku-rwimbo rwani orwa okukukumya,  
enijja okukusoosisha ekimweso,  
na okugobhya amang'ana goone ganu :neeyimirisiishe ku-awe,  
kwa okubha Yewobha Nyamuwanga niwe keerusha."

10 Mmbe, Yewobha :naasiiga riiswi riryia ritanake Yoona. Kimwi  
riiswi riyo ryone, ndimutanaka ku-kyaro.

### **Woori Yoona keekirisha okugenda Ninawi**

**3** <sup>1</sup>Riing'ana rya Yewobha ndijira Yoona kweki, ^noongwa  
ndimubhwira ati, <sup>2</sup>"Genda mu-musi omukuru gunu ogutogwa  
Ninawi uraasishe abhaanu ing'ana inu :naakubhwiriiye." <sup>3</sup>Mmbe,  
Yoona ^neemuka, ^naagenda Ninawi rwa kutyo Yewobha  
:aamuragiriye. Ninawi :gwariga guri musi munene muno, obhugari  
bhwago :waaribhataga masuubha gasatu.

<sup>4</sup>Bhunu Yoona :aayikire mu-musi moyo, ^neengira. :Eejire  
aagwisha riisuubha ^naaribhataga, ^naamba okuraasha ing'ana ya  
Nyamuwanga ^naaikaga ati, "Gikyari-yo nsiku makumi gana era,  
abhaanu bhoone abha mu-musi gwa Ninawi abheetwa."

<sup>5</sup>Mmbe abhaanu bha mu-musi guyo :bheejire bhongwa, mbeekirisha  
ing'ana ya Nyamuwanga. Kimwi mbabhwira abhaanu bheeyime  
ebhyookurya, mbafwara na gingibho gya amagunira. \* :Bhaafwaye  
kutyo kwambira ku-bhakuru na ku-bhatooto bheebhwe. <sup>6</sup>Amang'ana  
gayo ngayikira Omukama wa Ninawi woone ^naageekirisha.  
Omukama ^neemuka ku-kitebhe kyaaye ekya obhutungi, ^naafuura  
gingibho gyaaye egya ekikama, ^naafwara gingibho gya amagunira,  
^neekara mwifu. <sup>7</sup>Kimwi omukama ^naabhwira abheekasi bhoone

---

\* <sup>3:5</sup> Mbafwara na gingibho gya amagunira. :Yaariga iri ntungwa ya abhaanu bha  
bhyaro bhyafu, okufwara gingibho gya amagunira, okweresha obhusurumbaaye  
bhwebhwe.



*Yoona kaaraasisha Abhaninawi  
riing'ana rya Nyamuwanga (3:4)*

abha Ninawi ati, “Anye ni anye omukama, niri amwi na abhatungi bha mu-bhutungi bhwani. Enisiiga ati,

‘Asige kubha-wo muunu woonewoone na kitunganwa kyonekyone kinu kiraarabhe ekyokurya. Ni musiro ku-muunu na tyanyi yooneyoone okurya na okunywa, mu-nsiku esatu ginu. <sup>8</sup>Abhaanu bhoone na gintyanyi gifware gingibho gya amagunira. Abhaanu bhoone bheesasaame Nyamuwanga kwa mutima mweru. Abhaanu bhoone bhasinwe ebhikayo bhyebhwe na amasungu geebhwe. <sup>9</sup>Amwi Nyamuwanga kaatura akayindura ganu aaikire, asige okukirorera esungu kisige okufwa.’”

<sup>10</sup>Nyamuwanga :eejire aarora ganu :bhaakorere, na kutyo :bhaasigire ebhikayo bhyebhwe ^naayindura kutyo :aariga aaikire, ^naasiga okubhakorera kutyo :aariga aramuuye.

**Yoona kaabhiyirwa**

**4** <sup>1</sup>Nawe riing'ana riyo ritajomesiishe Yoona, Yoona ^naabhiyirwa muno. <sup>2</sup>Mmbe, Yoona ^neesasaama ku-Yewobha, ^naamubhwira ati, "Amang'ana ganu tari nigo :neeganiirisiishe nokyari iika? Kyakora :naariga niirukiiye Tarishiishi. :Naariga nimenyere ati awe uri mwendi wa abhaanu, uri na ekigongo kyafu, utakubhiyirwa bhwangu, na uri mwangu owa okuyindura ganu owukena nuusiga okugaramurira. <sup>3</sup>Mmbe woori Yewobha, enikwisasaama ati unyite era. Kwa okubha nyakara nifwe, okusigara-wo kutari na bhwera ku anye."

<sup>4</sup>Nawe Yewobha ^naamusubhya ati, "Owutoga ati owukora kujomu okubhiyirwa?"

<sup>5</sup>Niwe Yoona ^naasooka mu-musi gwa Ninawi, ^naagenda ^neeyikarira ebhuwuruka esuubha obhwa omusi gwa Ninawi. ^Naayika eyo ^neeyumbakira ekiwuuna ^naabha mu-mbewo, ^naategerera okurora ganu garaanyoore abhaanu bha Ninawi. <sup>6</sup>Yewobha Nyamuwanga ^naasiiga omurerema gumere, gurande. :Aagumesiishe gurande ku-kiwuna guyaane Yoona imbewo eya okumunyira-mo. Yoona ^naqomererwa muno riirerema riyo. <sup>7</sup>Nawe



*Yoona ari mu-kiwuuna (4:5)*



*Omumwi ogubharira Yoona (4:8)*

orusuku rwa akabhire muruguru, Nyamuwanga ^naasiiga ebhinyerere bhire omurerema guyo, kimwi omurerema guyo nguuma. <sup>8</sup>Anu riisuubha :ryawurukire, Nyamuwanga ^naareta inkomaaji, omumwi gwone ngubharira Yoona ku-mutwe kimwi ^naayururuka.\* Kimwi Yoona ^naaika ati, “Nyakara nifwe era, okusigara-wo kutari na bhwera ku anye.”

<sup>9</sup>Nyamuwanga ^naabhwira Yoona ati, “Owutoga ati owukora kujomu okubhiyirirwa omurerema guyo?”

Yoona weeki ^naasubhya ati, “Yee, enikora kujomu okubhiyirwa anye enenda nifwe.”

---

\* **4:8** Nyamuwanga ^naareta inkomaaji, omumwi gwone ngubharira Yoona ku-mutwe kimwi ^naayururuka. Inkomaaji inu :yaayembaga muyaga mubhira, na omusi gwa Ninawi :gwariga guri ku-nsi ya orukungu.

<sup>10</sup>Yewobha ^naamubhwira ati, “Omurerema gunu gumerere na kukura kwa rusuku rumwi, ingeta niiyika nguuma. Awe utatuuye-ko kyawo, na utaguyambire. Ndora owugufwira ekigongo? <sup>11</sup>Kandi woori itari kujomu anye okufwira ekigongo abhaanu abha mu-musi gwa Ninawi? Na mu-musi guyo toga giri-mo emyandu myafu muno, na abhaanu bhiwumbi egana rimwi na makumi gabhiri, abhaafu bhakyaari kumenya eng’ana ejomu na ebhiibhi?”

---